

開放文學 – 歷代筆記 – 夷堅乙志 卷第十二

真州異僧 金華范茂載渭建炎二年。以秀州通判權江淮發運司乾官。官舍在儀真。方劇賊張遇、寇淮甸。民間正歡。范泊家舟中。而日詣曹治事。其妻張夫人。平生耽信佛教。每游僧及門。目所見物。悉與之。不少吝。郡有僧鳴鑊行乞於岸。呼曰。泗州有個張和尚。緣化錢修外羅城。張邀至舟所。僧於袖間出雕刻木人十許枚。指之曰。此為僧伽大聖。此為木叉。此為善財。此為土地。命之笑。則木人欣然啟齒。面有喜色。取一兒枕鼓而寢者以與張。曰。此僧伽初生時像也。又以藥一粒授張。戒使吞之。張施以紫紗皂絹各一匹。僧甫去。范君適從外來。次子以告。問何在。曰。未遠。遣人追及。將折困之。僧殊不動容。索紙書十字者二。又書九字及徐字於下。以付范。即去。張氏取藥欲服。而其大如彈丸。不可吞。乃命婢磨碎。調以湯而飲之。明日僧復至。問曰。曾餌吾藥否。以實對。僧歎曰。何不竟吞之而碎吾藥。然亦無害也。後兩日。賊船數百。渡江而南。將犯京口。最後十餘船。獨回泊真州。殺人肆掠。是時岸下舟多不可計。舳艫相銜。跬步不得動。范氏之人無長少。皆登津散走。張以積病不能行。與一女並妾宜奴者三人不去。但默誦救苦觀世音菩薩。時正月十四日也。一賊登舟。從蓬背搵矛入。當張坐處。所覆■衾四重皆穿透。刃自腋下過。無所損。賊跳入中。又舉矛刺之。出兩股之間。亦無傷焉。賊驚異釋仗。問曰。汝有何術至是。曰。我以產後得病。故待死於此。但誦佛佛耳。安得術哉。家藏金銀一小篋。持以相贈。幸舍我。賊取之而留其衣服。曰。以為買粥費。去未久。又一賊來。持火藥罐發之。欲焚其舟。未及發而器墜水中。亦捨去。俄頃兩岸火大起。延及水中。范氏舟纜已斷。如有牽挽者。由千萬艘間無人自行。出大江。茫不知東西。唯宜奴扶柁。夷猶任所向。及天明則在揚州矣。范之弟茂直為司農丞。從車駕行在。即挈取之。是日一家十四口。數處奔迸。並集於揚。不失一人。方悟碎藥無害之說。使如僧言吞之。當無驚散之苦矣。范歸鄉。因溺水被疾而殂。正年三十九。葬於葵。買山於徐家。盡與紙上字合。僧不復見而所留木兒。亦不能動。具後張夫人沉痾去體。壽七十乃終。其子元卿端臣說。

章惠仲告虎

成都人章惠仲。與其妹婿丘生。紹興二十六年以四川類試中選。同赴廷試。未出峽。舟覆於江。丘生死焉。章僅得免。既賜第。調井研縣主簿。還至峽州。得家書報其弟病死。章茹哀在道。兼程而西。跨羸馬。倩一川兵挈囊以隨。過萬州。日勢薄晚。猶前行不已。遂墜崖下。去岸十餘丈。遍體皆傷。不可起。俄有虎至。奮而前。銜其髻欲食。章窘怖。呼而言曰。汝虎有靈。幸聽我語。吾母年八十矣。生子二人。女一人。往年妹婿死於水。今年弟死於家。獨吾一身存。將以微祿充養。今汝食我。亦命也。無足惜。索吾老母何。虎自聞其言已釋髻。低首為傾聽狀。語畢即捨去。盤旋其傍。若有所捍御。夜過半。章痛稍定。睡石上。夢人告曰。天欲曉。可行矣。覺而已明。攀危木寸步而上。及登岸。馬猶立不動。遂乘以行。告救皆在身。但囊為兵攜去。章赴官滿秩而母亡。未幾章亦卒。乃知一念起孝。脫於死地。專為母故也。異類知義如此。與夫落陷不引手而擠之下石者。遠矣。可以人而不如虎乎。

大散關老人

政和末。張魏公自漢州與鄉人吳鼎。同人京省試。徒步出大散關。遇暴雨。而傘為僕先持去。無以障。共趨入粉壁屋內避之。敗宇穿漏。殆不容立。望道左新屋數間。急往造焉。老父出迎客。意色甚謹。縱觀客容貌舉止。目不暫置。二人同辭而問曰。老父豈能相乎。應曰。唯唯。魏公先指吳生扣之。笑曰。大好大好。而不肯明言。吳生指魏公曰。張秀才前程如何。起而答曰。此公骨法貴無與比。異日中原有變。是其奮發之秋。出將入相。為國柱石。非吾子可擬也。二人皆不以為然。會雨止。即舍之去。明年。魏公登科。吳下第。公送之出西郊。臨別謂曰。君過散關時。幸復訪道傍老父。吳雖不樂父言。然亦欲再謁休咎。及至昨處。唯粉壁故在。無所謂新居者。詢關下往來人皆莫知。魏公既貴。為川陝宣撫處置使。吳猶布衣。以公恩得一官。竟不顯。二事皆黃仲乘說。

肇慶土偶

鄭安恭為肇慶守。有直更卒。每夜半。見城上亭中火光。往視之。乃十餘人及小兒數輩聚博。卒有膽不懼。戲伸手乞錢。諸人爭與之。幾得三千以還。明日驗之。真銅錢也。不以語人。次夕又如之。遂賂掌宿節級。求專直三更。所獲益富。逾兩月矣。會軍資庫失錢千餘緡。並銀數百兩。揭榜根捕。或告雲。此卒近多妄費。又衣服鮮明。可疑也。試擒之。詰其為盜之端。不能隱。具以實言。鄭意必土偶為奸。乃係卒使人部往。遍索諸廟。至城隍廟中有土偶。狀貌類所見者。碎之。腹中得銀一笏。盡剖之皆然。因發地。凡偶人下。各得數十千。合此卒用過之數。更無少差。即盡毀偶像。其怪遂絕。安恭說。

韓信首級

席中丞晉仲旦政和中。為長安帥。因公使庫頽圯。命工改築。於地中得石函一。其狀類玉。蓋上刻韓信首級四字。乃篆文也。其中空無一物。即徙於高原。祭而掩之。朝奉郎鄭師孟說。鄭與席為姻家。

江東漕屬舍

江東轉運司。在建康府。三屬官廨舍處其中。其最北者。相傳有怪。前後居者多不寧。隆興二年。陳阜卿為守。湖州通判方釋之。送女嫁其子。館是舍。見東窗壁間。人影雜沓。謂牆外行人往來。不以為異。如是者終日。試往就視。則人物長不滿尺。騎從甚盛。如世之方伯威儀。馳走不絕。方君懼。即他徙。趙善仁獨不信。故往宿焉。中夜聞呼其姓名。晨起求巾幘衣服。皆不見。乃盡懸於樑上。皇恐而出。郡人言此地昔嘗為廟雲。釋之說。

王响惡讖

王响神道。在京師時。從妙應大師問相。得兩句偈曰。姓名不過程家渡。出郭猶行十里村。紹興丙子歲。罷當涂守。在宜興縣。又從達真黃元道求詩。其末句曰。巽嶺直下梅家店。福祿難過丑年春。會江東提舉官呂忱中。發其在宣城時事。置獄廣德軍。所按無實狀。獄不成。移鞫徽州。出廣德南門。過一嶺。問其名。曰巽嶺。固已不樂。至渡頭客舍小憩。則梅家店也。矍然惡之。不覺墮淚。同行士人衛博寬釋之。少解。命僕具酒。老兵就戶限椎鹿脯。响責其不潔。兵恚曰。此與建康府不同。何足校。响忿其不遜。盛怒。酒杯落地。即得疾不起。時丁丑年正月九日也。渡曰程家渡。去廣德恰十里。孫璉說。

秦昌時

秦昌時昌齡。皆太師檜從子。紹興二十三年。昌齡官觀滿。將赴調。見達真黃元道。戒曰。君壽命不甚永。然最忌為宣州官。若得之。切不可受。受必死。既而添差寧國軍簽判。不欲往。具以事白其叔父。叔父謂責之。遂受命。以九月十八日至家。五日而死。竟不及赴官。昌時自浙東提刑來會葬。聞達真在溧陽。往見之。達真曰。今年葬簽判。明年葬提刑。吾將往會稽奉送。昌時怒且懼。明年十二月十二日。果訪之於會稽。取紙寫詩。有二五相逢路再迷之語。昌時曰。壽止二年或五年邪。曰。否。二月或五月邪。曰。否。然則但二日五日乎。曰。恐如是。時會稽守趙士祭。提舉常平高百之。皆在坐。密問曰。提刑方四十五歲。精爽如此。何為有是言。曰。去歲見之於溧陽。神已去乾。曾與約送葬。壽夭定數也。何足訝。今不過七日耳。是月十八日。昌時具飯。召百之及其婿馮某。達真在焉。昌時坐間。取永嘉黃柑。手自銓擇。達真隨輒食之。食數顆。又擊其餘。擲之地。昌時以情白曰。叔父生朝不遠。欲持以為壽。願先生勿相苦。達真嘻笑曰。自家死日不管。卻管他人生日。左右見其語切。皆伸舌縮頸。昌時不樂。顧百之及馮婿招之出。自掩關作書。囑虞候曰。若黃先生尋我。但以睡告。虞候立戶外。忽聞筆墜地。入視之。已僕於胡床。涎塞咽中革革然。其家呼壻巫絡繹。妻詹氏泣拜達真求救。笑曰。吾曩歲固言之。今日專來送葬。命止於此。雖扁鵲何益。善視

之·三更當去矣·至時果死·

成都鑄工

政和初·成都有鑄工·出行廛間·妻獨居·一鬻髻道人來·求摘髻毛·先與錢二百·妻謝曰·工夫不多·只十金足矣·曰·但取之·為我耐煩可也·遂就坐·先剃其左·次及右·既畢·回面則左方毛已茁然·又去之·右邊復爾·如是至再三·日過午·妻不勝倦厭·還其錢·罷遣之·夫歸具以告·夫慍曰·此必鍾離先生也·何為拒之·正使盡今日至明日為摘鬻·亦何所憚·吾之不遇命也·即狂走於市·呼曰·先生舍我何處去·夜以繼日·饑渴寒暑皆不顧·如是三四年·遍歷外邑以至山間逢樵人弛簷·樵詰之曰·汝何為者·告以故·樵者曰·此神仙中人·彼來尋君則可·君今僕僕一生亦何益·吾雖至愚·然聞得道者·非積陰功至行·不可僥冀·吾有秘術授君·君假此輔道·摩以歲月·儻遂如願·戲拔茅一莖噓之·則成金釵·謂工曰·試用我法為之·當有濟·工曰·此皆幻術不足學·我所願則見先生耳·樵者曰·君未見其人·正遇之何以識·曰詢於吾妻得其貌·已圖而置諸袖中矣·樵者曰·然則君三拜我·我能令君見·工設拜拜起·樵問曰·視吾面何如·曰·猶適所睹耳·再拜又問·至於三·視之無復樵容·儼然與所圖無少異·曰·汝直至誠求道者·汝哀號數年·聲徹雲漢間·上帝亦深憐汝志·故令吾委曲喚汝·汝從我去·遂與俱入山中·後二年還鄉·別其所知而去·至今不再出·

武夷道人

建州崇安縣武夷山·境像幽絕·中臨清溪·盤折九曲·游者泛舟其下·仰望極目·道流但指言古蹟所在·雲莫有登之者·紹興初·有道人至衝佑觀·獨欲入訪洞天·經數月·尋歷殆遍·無所遇·忽於山崦間得草庵·有道姑屏處·長眉紅頰·旁無侍女·問其來故·謂曰·洞天有名無形·相傳如是·吾處此久矣·不見也·道人曰·業欲一往·要當盡此身尋之·時天色陰翳·日已暮·姑邀宿庵中·道人謝曰·子婦人獨居·於義不可·曰·非有他也·茲地多虎狼·恐或傷君耳·竟不肯入·危坐於戶外·夜未久·果有虎咆哮來前·姑急開門呼之·答曰·寧死於虎·決不入少焉·又增一虎·嗥嘯愈甚·姑又語之曰·此兩黑虎性慈仁·餘皆搏人不遺力·君將為齏粉矣·道人守前說不為動·俄而五虎同集·銜其頭足以往·才十數步·擲於坡下而去·體無少損·遂堅坐達明·姑延入坐·嘉歎曰·子有志如此·非我所及·洞天蓋去此不遠·然尚隔深淵·淵闊十餘丈·驚湍怒流·但一竿竹橫其上·非身生羽翼不可過·亦時時有雙髻樵人往來·子試往·幸而相遇·當拜而問塗·不然無策也·既至·溪流洶湧崩騰·木石皆振·弱竹裊裊·不可著腳·適逢樵者出·乃前再拜·樵者矍然退避曰·山中野人·彩薪以供家·安敢當此·具以所欲拱白之·樵始秘不言·既而曰·誰為君道此·曰·聞諸庵中女·樵怒曰·多口老婆·妄泄吾事·令道人閉目·挽其衣以行·覺如騰虛空·雲龍出沒·頃洞兩耳間·既履地·乃在平岡上·宮殿崔嵬·金鋪玉戶·一人碧冠朱履·顧左右曰·安得有凡氣·道人趨出稽首·碧冠叱曰·誰引汝來·以樵者告·即遣追至前·袒其背·以鐵拄杖鞭之三百六十·血肉分離·骨破髓出·道人亦戰懼·碧冠曰·洞天乃高仙所聚·汝何人·乃得輒至·賞汝罪·宜速回·積行累功·他時或可來·命取水一杓飲之·中有胡麻飯一顆·飲水畢嚼飯·咀嚼移時·僅能食三之一·腹已大飽·碧冠笑曰·汝食吾飯一粒·尚不能盡·豈得居此·遂還·至崖下·見被杖者呻痛草間·曰·坐汝至此·吾方被謫墮·不知經幾百劫·乃得釋·汝去矣·歸塗不復見溪·安步長林·而足常去地寸許·回望高山深谷·窅非昨境·道姑與庵亦失其處·遂棲於岩石中·至今猶在·黃元道七八年前曾見之·雲山東人也·

龍泉張氏子